

Da turists, traditurs e politichers

La dertgira nauscha a Mustér ha sentenziau ils adversaris dalla Porta Alpina

■ (anr/hh) **La gliesta da tractandas dalla dertgira nauscha d'uonn a Mustér ei stada pulpida. Ultra da schabetgs dil davos onn enteifer la vischnaunca, ein era «problems» regiunals vegni tematisai. La fin finala ha la dertgira mess vid la fuortga ils traditurs ed adversaris dalla Porta Alpina.** Dapi igl onn 1989 salva la dertgira nauscha da gliendisdis tscheiver sia seduta el center dil vitg. Dalla terrassa dil baghetg dalla Banca Raiffeisen anora palese-scha ella sias tractandas e sentenzias. La dertgira nauscha ei daven-tada ina part integrala dil tscheiver a Mustér ed onn per onn attira ella ina roscha da vischinas e vischins dall'entira regiun, mo era hosps da vacanzas. Uonn ha ella priu sias decisziuns ella cumposiziun dallas duas derschadras *Yvonne Gienal* ed *Iris Casanova* sco era dil derschader *Fabian Huonder*.

Turists e terrorists

Naturalmein che la Porta Alpina – igl eveniment numera 1 ella regiun igl onn vargau – ei era stada in dils temas principals dalla dertgira nauscha a Mustér. Ella seda-monda, sch'ei fussi buca bien d'endrizzar egl avegnir fatschentas che procuran per vestgadira ed equipament d'ir cun skis per quels turists che serendan ella regiun. Aschia savessen quels arrivar e returnar a casa en calzers bass e jeans. Schliatas novitads dat ei dil hotel Acla da Fontauna: «Igl ei stau da midar zona tut alla bahut-

ta. Havess ei veramein duvrau in tal tamtam per metter si profils che smarscheschan ussa?» E lu ha la dertgira nauscha priu sut la marella la relaziun da Mustér e Tujetsch: «Da principi eisi sco ell'amur. Enstagl che quels che s'udessen ensemen massen ensemen, vegn ei pli bugen iu 'fremd'. Mustér va cun Nara, Tujetsch per-encunter cun Ursera. Dasperas s'udessen Tujetsch e Mustér gia daditg ensemen. Pertgei ils avantatgs ein evidents.» La dertgira ha lu tschentau la damonda als aspectaturs: «Ed uss dumandein nus tei, Mustér, eis ti promts da prender Tujetsch sco tiu partenari en buns e schliats temps, en onns da biara e da pauca neiv, tochen ch'il temps da glatsch vegn puspei, e cuviera en tut. E tè Tujetsch, ais tè promts da prender Mustair sco tiu partenari en buns e schliats tiamps, en onns da biè e da paucs turists, tocca tg'al Culm da Vi dat ensiamen?»

Politica a palavers

La dertgira nauscha constatescha che la politica a Mustér ei caussa dils umens. La fin finala importa la quota da dunnas el cussegl da vischnaunca sulettamein 20 per-tschien. E cun ina quota d'inter-pretidiers da biebein 50 per-tschien ei la risposta medema-mein clara: Tgi che ha fatschenta camonda. «Ei para che quels di-nosauriers hagian aunc mai udiu enzatgei da respect, da tedlar tier, da far cumpromiss e d'acceptar il

meini da concusseglieras e concusseglers. Sco pigns Blochers en in vitg alpin. Lein sperar sin me-gliers temps, pertgei zacu mieran ils dinosauriers lu ora.» Ed ils der-schaders han era contemplau l'executiva: «Empau Huonders ed empau Tuors lavuran ensemen cun in kaiser.» Ina strihada ha era il niev maletg empalont dalla vischnaunca retschiert il gliendis-dis sera: «Sch'ei duei a Mustér za-tgei semidar, il maletg empalont stos consultar. Ideas hai leu ualti biaras, mo aunc la finanziaziun procura per uiaras.» Schliatas no-tas retscheiva il program da scola 2010 dil cantun Grischun: «Sin fundament da quel daventan ils scolasts 'mädchen für alles'. Circa aschia sco dad ir cun Hollandes, Belges ed indigens sil glatscher da Medel. Tgi vess en calzers da cuolm, tgi vess en tschappas, tgi vess si skis e tgis vess en 'stöck-lischuas'.» La fin finala ei era igl «Edelweiss» a Sedrun vegnius tractaus dalla dertgira nauscha: «Forsa ei il puf digl *Alfred Monn* il motiv ch'igl interess per autras uniuns va anavos e schizun ch'il diember da naschientschas vegn pli e pli pigns.» Per conclusiun dalla seduta d'uonn ei la dertgira nauscha vegnida tier la sentenza finala. Ella ha pendiu vid la fuort-ga quels e quellas che han negin respect dil futur, quels che dian adina na e quels che han giu la gar-maschia da votar encunter la Por-ta Alpina: «Vid la fuortga cun ils traditurs.»



**Quels e quellas
ch'ein s'exponi en-
cunter il project
Porta Alpina ein
vegni mess dalla
dertgira nauscha
vid la fuortga.**

FOTO P. DE JPONG